

四庫全書

集部

欽定四庫全書

集部

雙溪集卷

六至八

詳校官中書臣孫溶

中書臣劉源溥覆勘

總校官編修臣王燕緒

校對官編修臣吳舒帷

謄錄監生臣張裕孚

欽定四庫全書

雙溪集卷六

明 杭淮 撰

歌行辭

中秋雨鳳山席上和獻吉韻

十三看月城之西已有清光夜中發今宵騎馬向城南
雲凝雨結愁無月陰晴變旦夕世事安可料徘徊一樽
酒臨軒發清嘯烏鵲枝頭夢豈安仙人何處遊三山三

山渺兮不可及竹葉林深烟火濕

題士人魚畫

黑雲如屯震雷急疾風吹沙海水立赤鯉飛騰若有神
蛟龍信非池中物大者昂頭向天門小者鼓翼爭掀掀
丈夫遭時各有奮肯使黃鰓終丘園

送楊恭甫父太常卿致仕

雲霄功業方鞅掌春山忽夢烟霞長封疏朝辭白玉除
束書暮上青簾舫飄飄孤鴻翼浩蕩白鷗波濯足彭蠡

湖放浪行且歌匡廬峰高幾千丈頂摩白日青霄上吁
嗟可望不可攀徒使清風能激頑

贈趙戶部叔鳴

愧余論交忝管鮑君有長才更年少落筆雄辭神鬼驚
風雨夜中龍虎嘯李杜文章誰與儔千載豈易垂光休
苦心何必泥同調碧海鯨魚知自求指揮兼得廟堂理
駿足追風軼天駟他時功業須麒麟不獨聲名在文字
我初許身如雙玉皎皎肯使終毀黷老大曾無尺寸補

齷齪虛慙食君粟茂陵消中日月移刮磨前輩心神
癡閉門斲輪亦已疲出門每使哲匠嗤聞雞拔劍夜
中起歎息草木恐同棄但使蹤跡無相違躑躅跛牂
願隨驥

題客部錢世恩井地爐

世有水火爐便溫酒也世恩則以銅鑄一大爐
象井地法分為九區中貯火置酒餘八區置穀
品水周於其下火盛水熱冬天可久坐無寒食

吏曹楊名甫見而奇之作長句余亦用韻奉贈

錢君作鑪出新製赤銅脫冶巧且精一方周平僅盈尺
分明井地區畫成中有鐵斗貯炎火眼前突兀尤孤撐
憶昔周王治岐日分田制祿大小形此法一定遂帖耳
豪強不敢為縱橫後來商鞅事兼併繼之秦楚七國爭
干戈擾擾無寧歲斬伐人命如薪燕良法美意蕩滅盡
士有狗盜為雞鳴公卿不得食田祿寂寥宗廟缺銅羹
至今志士竊歎息糟粕簡冊空遺馨何物之鑪實象之

區區豈獨專烹烹吾知錢君廟堂理不事口舌徒為憎
致君澤民默區區會試將心志施鼎鑄器物雖小可制大
坐令四海傳風聲或云此法不可復君臣千載嘗論評
吁嗟尼父告朔意羊存猶得識重輕飛雪朱樓置高宴
賓客回頭有深情錦羹銀鱸不足具雲芽玉液波濤生
感君下筯恣一飽慙愧兼濟難為名君不見東南民力
竭冬寒菜色生茅衡

見竹

望湖亭高數枝竹雲葉經寒未抽綠風吹蕭蕭亦可人
對之不盡尊中綠此君本宜江淮地何人移向燕谷底
總為易地改顏色要是貞心終不死

送同年史禹臣之官南道

繡衣白面郎驄馬金鞍光翩然持斧向江左秋鷹試翮
雲霄長更有慈顏侍朝夕洲渚風生鱸銀白興高落日
動豪吟江上諸峯為君碧君誠美文才淵源滄溟開瑞
世鳳麟出鍾山毓奇塊信宜天子置之在耳目譬如車

行具輔輻君如不負諫諍姿與君別離心亦足

送沈仁甫決獄幽燕

朔風飄拂雲蒼莽草木黃落鴈翱翔天王肅殺順時令
玉節使君臨朔方青驄馬肥白玉珂翩然文彩宛清揚
兼有先聲破奸宄腰下佩刀明雪霜頻年歎息民無食
道路縱橫多盜賊赤子無知亦有情安可區區任三尺
歐公秉燭為求生仁聞昭然在簡策九重軫念祥刑書
皂囊早獻明光側

李獻吉瓊林圖歌

龍飛癸丑六載春起攀龍鱗三百人朝陽鳳凰集翩翩
高岡梧桐雲葉新宮花勝簇紅綾餅勅賜傳宣宴蘭省
罷酒樓前各上馬紫絲鞭拂曲江杏中有少年白面郎
藍袍玉勒城關東道傍觀者如按堵云是關西李崆峒
崆峒山何雄峙東跨平涼西涇水河嶽降神亦不數五
百年來有一李李君之望兀律如雲中巔李君之才湧
躍如山下泉只今羅致明光前天子推轂方右賢便當

為霖雨九天傳巖聲光相後先區區高牙大纛之榮安
可憐

送馮廷伯僉憲廣東

鐵冠豸峩峩驄馬新韉鞍軒軒風骨不可擬當蹄千里
雲霄寬酒壺合省河之許慷慨停歌日欲午朔風吹旗
雲莽莽落木映空原膺膺君才磊落不可羈眼中交游
亦所稀驅馳百粵歲云暮令我對此心神飛百粵南歸
滄海深沸煎海水勝黃金猿獠獠狡性所習月寒遁臂

枕椰陰貨泉自是軍國利達人豈作刀鉞計賈客風帆
雲海長炎方蒼茫亦兼濟

送陳戶部嘉言經理邊儲

使君銜命富經略春日褰旗出潼關潼關之西極沙漠
腥風萬里吹陰山天子日夜思備邊要使三邊晏無虞
寧夏猛將擁黃鉞白馬使臣持玉符敵情叵測要謹備
不貴攻戰貴堅守兵強馬壯邊廩實指揮上下須公手
即看奏凱蓬萊宮月明夜靜無邊烽酒酣上馬意慷慨

三月塞上觀花紅君不見充國屯田十二事至今漢功
在青史

送錢士弘監祝杭州

江畔柳何青青花飛化作江心萍風吹波濤散無跡人
生去住亦何憑君去還復來春滿黃金臺不須對此意
愴惻高歌且覆燈前盃憶昔坡翁守杭地半在西湖了
公事君今豈是坡翁流瀟灑風情亦山水詩成想像寄
遐風雲樹渺渺江之東

哀同年鍾毓之父

扁舟寂寞愁南渚不見當時舊遊主
清詩零落尚堪歌
水花春深空楚楚花落盡還復開主
一去兮何時來寒
風蕭蕭白日摧清江細雨孤猿哀

送吳尚書忠節之孫鳳翔還宜興

君為吾鄉忠節之子孫醞藉風流殊不羣
憶從尚書死
滇寇流落湖襄如綫存春來秋去復誰在
衣簍食缺貧
到身太僕節義本天性

李應貞

辛苦持牒搜諸民吾師同

聲有楚相

王文冕

徧告官司給舟楫百年一日見故里田

廬何有但空村故老相持欲泣下幸今不作他鄉魂古

來忠節亦云罕一代吁嗟無數人巍然廟貌食滇土却

與待制齊榮尊

王待制亦死滇寇

天子思功錄其後豈必君身

終賤貧君行且作買山計守義俟命期振袂尚書墳拋

應山縣春風寂寞吹荆榛君能數鼓瀟湘舵岸藻汀蘭

歲歲新

飲安慶江亭

江邊幸逢賢太守冬日江亭置春酒亭前長松不計年

蟠拏屈曲虬龍走同年更逢王喬流

丁時正
在席

蕭颯仙飈

度巖牖日暮天風吹更急江勢洶湧波濤吼艤幢崩奔
欵西向陣馬臨江亦何有壯哉乾坤目力盡歲晏蒼茫
苦客久何當風後西南至擊帆須臾過京口

題元余左丞忠公祠

當時鏖兵集慶路耿耿忠義有左丞荆揚賊柵蝟毛起
慄慄孤城誰足撐手提干戈自血戰六年展轉無援兵

誓不與賊同死生張許獨守睢陽城城陷身危世事去
天下之勢如土崩嗟哉公妻義不辱亦與諸兒同日阬
丈夫忠烈有如此皦皦上貫日月精海上五百猛士死
悲歌慷慨思田橫秋深荒祠石漠漠猿哀落木雲冥冥
江流暮激石頭怒遺恨猶存戰伐聲嗚呼吾皇為公殺
賊亦足報公今廟食公須平

奉送劉司馬致仕歸東山草堂

憶昔東山草堂下明公高臥如南陽九重寤夢思故老

玉節使臣日相望翻然彈冠出澗壑道路聞者皆謳
歌安石當時使不出其如天下蒼生何去年諸部大入
塞緣邊烽火通甘州親與先皇定籌策一日坐使旌旗
收功多絕口不復道身老却思還故丘片帆乘風下荆
襄萬里雲霄仰孤翼東山今朝有主人草堂物物生顏
色

明山草亭題贈王亞卿兼簡東山司馬

東山有草堂明山有草亭柴門紆迴間相向洞庭掩映

秋冥冥主人歸來已白頭
葛巾兩兩山花馨一日二疏
孰堪並但使聲光留漢廷
緬仰高風不可攀雲霄回首
雙崖青渺然自此江湖遠
憂君吾恐未忘情

憚民部功甫惠鮮筍銀魚

西曹暮歸城烏棲明星在門北
風作歲晏天涯感我情
相對妻兒苦不樂小女手持銀魚至
兼有筍芽如犢角
云是地曹長官送此意年來重寥落
三寸冰僵白雪蛆
數莖春筍紫泥籜南山風高滄海深
冬月何由見珍錯

呼兒剥笋仍烹魚入口香醪甘似酪更長燭明一放歌
迴首少年事如昨

曹娥廟十韻

清晨整衣謁曹娥野廟向江風瑟瑟曹娥婉孌行及笄
江沅寒姿映初日昔時父溺迎江神巨浪洪濤不可覓
哀號跳從黿鼉窟三日雙魂抱江出閨門孝義性所敦
甘死不愛青春質至今碑殘絕妙辭臘日村童走芬飴
荒庭漠漠雙桂晚石壁秋深紫苔密廟巫尚出采恩封

花語斷決光在室丈夫何以急君父萬古流芳豈徒卒
俛仰臨風欲感泣雲滿寒江雪峯翠

正月八日寄壽世卿家兄六十

兄羈甌閩已六載弟亦浙水三經春相望青天有明月
翱翔鴈影虛來賓兄年六旬髮皓白而我蹉跎亦半百
吁嗟歲月易拋擲安得持杯事朝夕憶從閹豎秉政時
跼蹐奉公天益卑幾至反覆汚神器賴我天王亟誅夷
兄弟雖今不數見禮法從容亦胥燕馳驅勉竭駑鈍力

成功各保林泉願
閩南地暖正月花
旭日初升灩流霞
題詩千里遙相望
雲白山青滄海涯

託吳僧乞石田畫

緬懷高人今白頭
秋風未放滄江舸
嘆息人間常見畫
白水丹山無不可
有時更出雙梧桐
柯如碧玉參青空
下有閒翁曳杖屨
蕭然意氣來清風
自是君身有仙骨
此杜句狀君最得
放筆塵寰看超忽
且知畫者乃餘事
君有聲

名不汨沒吾亦平生
頗好畫逢人不愛
千金求安得生

綃出東壁白雲為我生滄洲

哭同年姚子玉三章

憶昔看花曲江曲
紫杏緋桃暗江麓
轉頭零落秋風生
失却同袍姚子玉
姚子玉今何之
空林日暮無歸期
荒烟慘澹猿號悲

憶昔同登天子堂
玉佩腰環齊結束
南北空嗟三百人
脆折頽然姚子玉
姚子玉今何鄉
思君不來色惆悵
陰風颯沓生瑤章

憶昔兵曹聯數人，
衰然文章秀而縟。
雲霄千里期翱翔，
車軸中摧姚子玉。
姚子玉何冥冥，
魂招不來將焉託。
愁雲漠漠江花落。

送同年王載卿使廣東

憶昔荆溪花發時，
樓船泛雲日悠揚。
秉燭高歌大魚出，
風湧三更殊未央。
倏忽轉盼已陳跡，
鞍馬共逐風塵客。
都城對面亦須臾，
兼有簿書相促迫。
秋風嫋嫋生江湖，
復送君登萬里途。
蒼茫五嶺炎荒地，
無使瘴癘侵肌膚。

送盧伯居朝覲

憶昔看花曲江曲今日同遊滇水陽
海內異姓有骨肉德業相勸爾我忘
送君今作朝天行把臂躑躅令我傷
關山出門咫尺異聚散人生不可常
寒風九月吹衣裳白露團團秋菊黃
更為後會知何地殷勤更送東門觴
三年天子朝明堂手疏黜陟敷明光
只今海內誅求盡西南更苦民瘡瘡
牧養由來重守令作合典則須賢良
憂時洛陽賈太傅早知琴瑟在更張

劉元瑞贈劒作短歌奉酬

故人遺我以寶劒
出冶芒寒上衝斗
炯如秋水涵晶光
揮霍臨軒鬼號走
感君意氣吳季子
慷慨及此同生友
加以琕琤垂錦鞬
錯落應看百朋後
珍重何求出上方
恐懼惟干佞臣首
結束相隨萬里身
磨礪肯使纖塵垢
變化蛟龍倏有神
恍惚風雨生我肘
吁嗟壯志白髮生
為君高歌一對酒

觀張南園畫作歌因索溪澣春雲圖

憶昨參戎之府觀公丹青圖已覺妙絕今所無公為海
內文章伯落筆自與他人殊隨龍雲氣忽飛動海天雨
脚吹堂隅萃律回頭絕島孤野橋分明斷岸紆更貌一
杖仙翁癯抱琴瀟洒清童俱吁嗟青雲客負異稷契姿
早時拂衣臥南極無乃抱此胃中竒烟霞適與幽興會
髣髴坐我清溪湄清溪指吾荆溪鱸鮓發發春漲動漁舟兩兩
花枝敲清溪迢迢渺何所歲晚天涯滯遊子願公為我
揮灑隨篋笥道路風塵長見此

見羅羅

野人形骸如木土出入防身負長弩白布裹額金耳環
腰下紅絲約雙股道傍私語如嗟咨山深少見漢官儀
由來人情一失撫不獨此輩為豺虎

望香爐山喜苗平作歌簡貴陽諸公

去年過清平苗寇滿山谷今年來清平苗已就殺戮嗟
哉狼子亦蠢爾爾亦有生何自覆天王至仁大一統乾
坤洪纖總包育香爐山高亦石耳靈異豈不厭腥毒苗

兒託以為性命豈知悖亂終不穀邇聞苗從未死時殺
氣先已盪山腹又聞官軍上攻夕巔崖霹靂飛迅速乃
知皇天亦震怒殺伐空中如破竹釜中遊魚無脫鱗穴
有聚蟻何逃族山清已喜出污穢雲白遙瞻麗層矗行
人道路歌迴首從此偏橋罷輸粟諸將謀深不世功九
重顏開莫荒服此日天山早掛弓千載燕然有遺躅苗
今望山應蹙眉王法畏人休再瀆嗚呼王法畏人休再
瀆

賈太傅宅

千年故宅空形影古井荒苔只自深寂寂星沙繫舟晚
長楸五月寒蟬吟太傅才高稷契姿漢室小康安足期
惜哉少年苦太急一為痛哭君臣疑

定王臺

昔聞運土自關隴

長沙土不堪築故用陝土

飛輓沿邊應力窮辛苦

萬民易一樂百年却作千年功定王已矣江流東野花
寂寞空春風愛惜露臺十家產區區豈在遊觀中

鎮遠會同年劉少參振之念故鄉山水將卜隱居

因題以別

三河有靈山下有洵陽泉山高嵯峨鬱而秀泉性溫煥
清且漣聞君念此將誅茅未去已覺心飄然雲霄赤驥
整初駕風颭急隼當秋天胡為早作宴遊計無乃愛此
山泉偏憶昔京都與君別回首十年不相見今朝執手
巖山中覺我衰遲顏髮變浮雲生態自朝暮碧草餘葩
滿郊甸人生出處何必同鍾鼎山林各性願別君何地

更逢君把酒臨江心緒亂

奉送貴州周巡按子賢還朝

憶昨貴陽相見時朱榴花開光景遲
言論侃侃見節操邊城五月清霜飛
海內相逢恨不早憂時每見杜陵詩
夜郎西來有逆順苗獍亦知事鋤犂
草中狐兔不足數道上豺狼猶自肥
去年天王狩東都不知何日還宮闕
南國地遠無消息滄海日暮窮愁思
只今濟時須公等袖中短疏安施為
喜今簪筆朝天去坐見一日新朝儀

從此驚輿罷遊幸九重端拱問瘡痍

醫俗亭為安慶石都閩作

聞道其亭臨江城亭前種竹千萬箇六月炎天冰雪生
陰森髣髴湘雲墮君閱朱旗北斗間寤寐不忘亭中卧
自言學得惺惺法虛心不受塵土污吾聞善言君則取
持忠奉君不少挫豈謂有竹真可醫已覺世間凡俗破
吾生迂疎寡檢束亦思砥砒去多過直節虛中環我前
安得江亭一廻坐

書事

滁陽三月苦多雨田開麥苗半枯死聞道江南濕不妨
壠畝已熟如雲黃麥熟家家得飽飯內顧妻子亦得將
邇聞縣官明且賢顧憂民患得所先射殺南山白額虎
鄉村無擾人得眠江北水旱何頻仍惜哉其田無力耕
送王方伯拱之致政歸首山

君初讀書首山陽致身青雲澤天下叶黃金橫帶荆襄
間常想晴雲在牕戶一朝早掛東門冠富貴功名亦何

為逢迎還作首山主白首從今願無違翻思昔日朝天
去荏苒于今三十年鄰翁野老欣候門看花釣水來黃
緣自昔箕顙有高步君去嵩洛同襟期孤飛黃鵠雲霄
上冥冥萬里何由追

滁州穀日寄壽世卿家兄

去年在家稱兄壽今年却羈滁山阜自古人生多別離
骨肉豈能常聚首今年春交在臘前淑氣迴旋半月候
紫霞霏微繞山巔雜花相將映池口緬想高筵白日張

玉簫驚和鼓鼉吼飛觴合省賓從俱兄弟之中獨予後
弟比兄年少十歲白髮盈簪已成叟高年每憶事揚樁
拂衣未得同疏受望望家山三百里春迷江上黃金柳
百年轉盼能幾時不願肘後印如斗已令兒曹闢西園
種竹十千塘半畝早晚上疏乞歸來歲歲春風共杯酒

古亭為邵昌言題

邵子結亭湖之滸不慕今人却慕古吁嗟古道豈異今
自是今人棄如土學古先在子之誠不然無乃為虛名

我姑語子以古道真如玄酒不和羹人情簡易自天性
力求吾心乃有定莫學東園桃李花紛紛却與春風競
天香玉兔圖

我昔折桂歲在卯玉兔秋生廣寒闕屈指于今三十年
青鏡頭顱已如雪高堂忽見畫兔出桂之下兔點白雪
毛桂發黃金英披拂絹素猶有情恍若耳邊聞鹿鳴

相思行寄中州和大齡

與君一別後兩見滁花開花開花落自春色思君高卧

梁王臺梁王臺深三尺雪哀絲歌管綠雲切至今風流
空耳聞祇見臺高上新月明月照君心手彈綠綺琴夜
靜聲激烈誰為聽君音罷琴對酒還復歌春風萬里吹
黃河相思相見知何地雪臺竹色今如何

送周中丞貞庵北行次韻

憶今五年不得見一見匆忙何即別金函將賀世室成
玉珮趨朝寸心熱關山蒼茫歲云暮癯形千里當冰雪
願君努力加餐飯馬上重裘慎朝發長安臘盡春色迴

喜氣風雲動城闕寵沐君恩拜舞餘緬想應歸二三月
瑯琊山深紫霞爛歐子亭高白石裂期君此時須少留
置酒花間候車轍

送竇舉人子雨入監

東風吹綠江楊柳黃金嫩問子何所之遡道觀光館

此湛

甘泉講學之所

觀光館裏多春風魚躍鳶飛眼中滿願子著意

事討求無使馳心放難犬憶子嘗從陽明遊微言應悉
大道本東望津涯日不息萬里滄溟豈應遠我方義戰

不能勝吁嗟迴頭惜已晚

送馬參將治守備燕河

將軍勇銳富才略北方大盜不足平此日秋風灑金甲
送君北上燕河營燕河逼近飲馬窟犯邊輕我無備兵
古人重守不重戰此行須爾為長城

穀日寄壽澤西家兄用滁州韻

去歲滁陽寄兄壽今日重在鍾山阜長江春色逐人來
萬里青天一迴首鴈影聯翩沙磧雲草綠憑將暄煖候

何當凌風一破浪擊帆須臾過京口愛兄久卧林泉幽
絕耳不聞朝鐘吼看花聽鳥只山間步石有孫隨杖後
更喜諸弟俱白頭時時相邀醉鄰叟我獨官拘不得去
相望新年負同受况兼世路多風塵何似閒邊淨花柳
彭澤當時懶折腰亦豈區區羞五斗但願兄筭等岡陵
庶乞身歸同畎畝客顏不柰春風吹長歌強對金陵酒
趣菊卷為楊博士致行題

趣菊仙翁冥冥久老圃黃花空復開雲結愁亭霜在野

不見當時白衣來遊子
哀哀心獨苦江空日暮愁登臺
對花揮淚洒江水
江水東流無日迴

送少司馬周貞庵入朝用去年為別韻

人生聚散如浮萍
相見無幾又相別
憶昨滁州當隆冬
今朝送君正苦熱
赤日紅塵汗如雨
可愛君心似冰雪
飄飄馬度秣陵關
佩劍鋒鋦試硯發
七月秋風稍涼冷
緬想鳴珂上金闕
側聞套外氣頗驕
征西羽書無六月
擇兵選將在精銳
更須慎守無滅裂
漢文遣使諭單于

冠蓋相望道結轍

酬張平山梧桐圖

張子墨妙今所無
寒天寫贈高岡圖
梧桐萋萋鳳噦噦
海天紅日升渠渠
鳳兮聯翩五綵色
梧桐霄漢雙撐扶
眼前煥爛見此物
吾恐草堂非所居
憶昔周時大雅歌
梧桐比君鳳比士
君道昭兮臣德彰
明良相須實相倚
只今遭逢聖明朝
子之意匠無乃爾
下階舞蹈日月光
吾為作歌謝張子

題牛圖

昔聞龐公隱鹿門朝出帶書耕且耘今之畫圖無乃是
千載高風猶襲人春草牛肥自安作夜歸息耕即穩卧
道傍駟馬擁旌旄孰知官高憂乃大

夏山草堂為張郡守題

吾侯昔隱夏山阿緬想禹功施九州一朝奮迅青雲端
脫跡夏山為國謀吾邦得侯若父母竹馬南迎虎北走
春田有麥今得收寇盜臨江亦何有

時江上
獲賊

吾侯自是

經濟才區區小邦安足羈禹蹟茫茫徧霖雨夏山不負
微時期草堂藏書春日靜白雲覆戶花蒲徑出處無勞
念故居功業方殷主明聖

題畫松

登堂忽訝生烟雲錯落長松偃東壁老幹半作虬龍形
枝葉長留歲寒色古來畫者有韋偃近時廷章亦可師
但留一幹在人世已覺澗壑無餘姿更添白石相撐倚
日照蒼苔淨泥滓摩挲不覺毛髮寒五月高堂朔風起

報捷圖為王希成題致期望之意

謝安方圍棋報有淝水捷高堂對客不動容過檻寧知
屐齒折我觀畫圖如有情白首為君歌鹿鳴知君一戰
勝多士區區報書焉足驚

王用昭第見吾弟道卿飲惠泉詩感而用韻

我昔嘗飲惠山泉手持大斗酌寒滴今宵坐我水石居
聽雨烹茶想春月掛壁出我道卿詩猶似當時歌白雪
酒酣慷慨增悲歌溪水浮鐺自清冽一飲七椀魂神飛

未許惠泉風獨攝挑燈一放老夫狂夜深斗轉黃金闕
松厓卷為沈欽夫題

聞君讀書碧山厓萬松陰森覆茅屋示我徵君墨妙圖
文徵明墨不覺雲氣生虛谷此松云植爾祖手半作龍鱗上

苔綠爾伯詩篇尚在眼伯沈感慨為君三過讀知君結

構繼前脩積學藏珍待徵儔清響颼颼風在林寒影蕭
蕭月生麓地僻山深人到稀時有猿猱伴幽獨梁棟已
具廊廟用輔弼終歸傅巖築爾家况多青雲士飛騰他

日於君卜

贈熊山人次鳳翁韻

昨勞相地南山來芒鞋踏遍長岡苔為言發龍自銅官
羣阜擁護如雲雷以手畫地指形勢造化混沌如一開
歎息人生亦易老祇求埋骨青山堆得保犁鋤不相及
富貴於我何心哉地之靈異勿復道人生有命亦胚胎
人鵲相感篇為丁明府作

神羊有角能觸邪黃雀銜珠知報恩誰云鳥獸至愚物

善惡相感惟其人有鵲生子在樹巔羣兒不仁攫其子
母飛哀哀鳴向侯口不能言似求理侯因推之得鵲情
還索兒曹置樹間母子相安且相慰昨苦喪失今生還
嗟侯之仁能及物鵲亦有心識侯仁侯鵲相感有如此
況吾海內同胞民有靈性異萬物感應之機易而速
聖王有道出至治鳥獸率舞人民育

釣魚畫為姪壻萬弘德上舍題

雲黑千山半明滅風號滄江凍飛雪孤舟漁翁把釣竿

坐擁寒蓑骨欲折若非逃名張志和
必是避世嚴子陵
畫師不識若流趣何得寄此孤高情
馬銜白玉珂身上
黃金闕何如滄江一老漁
白首無憂亦無蹶

張洞紀遊用姪壻萬弘德上舍來韻

重遊名山三月暮
雜花洞口春溟濛
捫蘿累足入地底
逸思飄然凌太空
舉頭顛崖若覆盞
瓊脂玉乳懸玲瓏
危臺百尺俯幽巖
疑與玄圃滄溟通
中有石笋起撐突
傍覺巨象駝蒙茸
烟雲氤氲不出戶
時有石燕飛空中

蟠拏又如伏虎豹踴躍或似舞蛟龍千態萬狀接不暇
吐舌駭此造化工眼無廬山瀑布泉暗滴石上時淙淙
把炬搜奇更深入日午重關掩瞳矐手撫石牀蹴丹田
恍聞玉女歌仙童丹田芝荒石牀冷至今修鍊留遺蹤
世上三十六洞天不知誰為似張公吾生足跡半天下
空聞海上有方蓬金銀宮闕拂紫烟綠牕玉樹生華風
弱水三千不可渡求仙却笑人匆匆不如騎鹿訪茲山
蒼崖咫尺非難從為語同袍二三子解脫還應早擊蒙

白日飛昇未足問靈襟已覺烟霞充憶昔遊時

缺

欽定四庫全書

卷六

邊景昭畫雞

景昭翎毛稱最奇江南人家藏者稀今晨忽披田舍景
不覺春風白屋低雄雞啄啄呼食義伏雌依依哺雛慈
雛或戀母或趨食三三兩兩紛堦墀牡丹掩映石之左
日移花陰淑景遲眼中分明畜產蕃當時不知寫為誰
至今相傳作玩好愛者不惜千金資嗚呼朱門厭酒肉

那識民間五母雞

沈石田與吳心遠遊罨畫溪燈下作畫題詩為別
石田沒而文衡山添一舟貌二公於中今心遠亦
沒矣見畫興感次韻

石田逍遙心遠逸攜手共作清溪遊風吹柳條映沙白
水涵舟楫兼天浮畫中誰為石田老瀟洒綸巾敲白頭
心遠飄然若仙儔意氣已覺凌丹丘惜今二老不復作
空使感歎臨長流賴有衡山補遺墨清溪明月至今留

和允卿弟臘雪志喜歌

飛蝗育種自北陸于今江南亦可憂去年臘前無尺雪
化魚不得隨長流昨夜北風吹雲黑已覺民間動歡色
須臾密雪洒人來萬里江山變俱白氣埋七澤縮蛟窟
凍合千林無鳥巢一雪三日亦頗奇門掩聞無人跡交
惟有巖前竹倔强向我青青未蕭瑟清賞遡風時捲簾
細詠臨池幾呵筆盡道明年五穀熟不愁窮閭九室空
直北遙應接銀闕上宜獻瑞明光宮眼前有隼一何猛

側身寒空逐禽過嗟爾啾啾黃雀羣苦飢日暮愁無奈

飲中贈陳萬南

故人遺我尺素書中云元龍湖海士一見真如錫百朋
文彩翩然動江溪問年蹉跎已七十胡為偃蹇滯行李
騏驥昂霄待顧盼蛟龍失勢須雲雨南州下榻惜遲暮
傾蓋白頭忘客主寒宵清論若河懸剪燭酣歌拔劍舞
慷慨為君起擊節須知伏櫪志千里自古有才多輒軻
鄭皮竈逐空老死天寒霜凍梅欲開且把金樽對君洗

送邵節夫副使往金騰兵備兼寄

缺

侍郎

聞君明發滇南騎郊原秋暑尚鬱煩衰年不

缺

走相餞

去時先問來時轅萬里遠道苦跋涉山高水深慎加餐

香爐峰高曉日赤碧雞風動

缺

花殷西行回首浪滄水

休聽樹杪三聲猿

知缺

至時玄冬交炎荒無雪常春溫

變人雜處風俗異情性亦知信義敦但使令明不驚擾

草中豺虎應星奔伏波奇勲桐柱標諸葛大名祠宇奠

丈夫志在撫四夷一身官高何足論金齒張公吾故人

辭章落筆驚淵源休言絕域寡交友握手應知道義存
張公相見如相問道淮今亦臥丘園

寄沐參將崧

故人憶自滇南別忽忽已是十年餘鴈飛亦似限南北
不道十年無尺書將軍勇銳富韜畧有才偃屈空居諸
吁嗟壯志豈終歇對客猶自談穰苴公家老驥適棄野
臂韝蒼鷹常待呼丈夫功業各有時幸今南夷晏無虞
應知靜處學不廢好客還似當時無春來秋去花滿戶

尚想棋局臨方壺

邵正夫得子未及賀聞又有熊羆之兆用王用昭

韻為贈

吾聞仁者必有後六十無子心頗疑春來喜得弄璋書
乃知生人各有期映簪白髮漸看蒲出掌新珠尤覺奇
惜君明經老不遇發跡承家今在茲北郭溪明正花發
春風席上好題詩積善公侯生衮衮拭目徐卿看二兒
壽張運使元之八十

人生八十徒有年公今壽考德且尊足跡不一踏城府
貞靜唯甘老丘園子野詩鳴三影秀彥方鄉歸君子仁
自公傳經更絕倫濟濟蘭玉蕃兒孫拱辰願入潞公會
司馬不敢班後塵憶昔拜公少壯日至今慚負登龍門
青宵冥冥一鳥羽晚山悠悠多白雲願將一勺長生醴
為公傾倒瑤池春

題王澹軒潮行樂園此生前所畫而今歿後見之
不能無感為長歌

往時舟楫一擊岸君卽倒屣候我門延我上堂款茶畢
輒請解衣遊北園舉網得魚勅華饌穿花入竹攜芳樽
一飲至醉必盡歡長笛短簫悲且繁今君冥冥不復見
披拂愁看畫圖面儀形應不異當時使我臨風淚如霰
北園光景慘澹中誰倩丹青移素練水上杏花猶自紅
亭邊柳條却如線便當持酒酌向君君如有語語不聞
嗚呼世無百年人猶如弱草棲輕塵生前有酒不自樂
徒使花鳥悲青春感慨爲君歌此曲座中聽者亦霑巾

贈華子從龍兼壽其父錄事幕君

美子青年美文章蚤歌鹿鳴發秋省秀拔自是金閨姿
高岡碧梧麗朝景憶昨荆溪辱製作未由識面先交神
鏘金鳴玉動風雅眼前作者徒紛紛龍山秋高氣相鮮
黃花日照衣爛斑錄事高年樂有子臨風一為歌南山
吳頤山憲副得子且復官用王用昭韻以贈

王生夢橘分贈君王卜有子君勿疑二陽初生春氣交
懸弧設矢來如期不須入室聞啼聲視父應知子之奇

況逢皇恩及門日昭代鳳雛應在茲老我擬叨湯餅客
壯君兼賦宦遊詩慨然攬轡周八極內顧無憂今有兒
蔣平甫年近六十無子因其家蘭結子亦用前韻
賦以下之

幽蘭結子古未聞君家有此却可疑君年六十尚無後
豈亦與子為禎期青青葉中特挺秀疑疑人間矜絕奇
草木靈怪亦何異天人感兆應在茲昭然已協熊羆吉
不須更頌斯干詩尚書門高世澤遠早晚擬出麒麟兒

書齋遣悶和子良苦雨作

白頭春心苦未歇時辭出遊候花發
老天何事料理人江上陰雲日輾轉
却怪雨聲徹夜聞祇恐晴時涉春末
南村北村看花伴咫尺相尋怯泥滑
開牕忽見杏花紅惜春過半如夢中
賴有青雲客相慰往復奚奴詩句工
傷麥死復用前韻

雨脚入春無日歇寒勒花枝苦遲發
夜來雨聲覺更甚不眠憂心殷輾轉
去年米賤太傷農人競鋤刀重趨末

今春雨多乃傷麥民急征求困豪猾看花不愁花不紅
閭閻望哺嗷嗷中九重若省東南力應罷頻年土木工

畫山水

烟霞蒼茫忽在座半空樓閣浮青春不須更問畫者誰
對此頗覺滄洲真白鷺羣飛雪點亂綠江萬頃苔紋新
漁舟兩兩停不去桃花春雨迷江津更於松下貌二老
涼風蕭蕭白葛巾仰天一嘯觀日出避世豈是巢許倫
吾生亦有烟霞癖瀟灑筆端欣會神酒罷聊歌紫芝曲

谷口青山生白雲

軒岐問道圖

天地開鴻濛聖人立人極不有法制創詎垂後代則軒
轅鞭草入山中松下至人逢岐伯當時萬乘略勢分偶
坐而談日西夕百草溫寒異性味大造陰陽有消息一
問一答意未間參錯天人理無忒形生神發苦物累劃
然指授愚蒙孽巫咸扁鵲首入神華佗元珠繼相翼至
今民命實有賴解脫死札超迷域何人寫此軒岐圖冠

裳蕭然出東壁雲斂羣山天為開水濶東溟月生白吁
嗟大道一語間天下萬世流恩澤

兵部劉巖卓母哀辭

秋風起兮木黃落鴈哀鳴兮度寥廓念芳魂兮暮何之
遊子腸斷兮歸將焉託伊昔寒燈暮雨兮抱冰檠而孤
居紡績以為生兮持門戶而漸拓嗟懿行之空存兮求
弗得而皇皇聿春來而秋去兮雜哀猿與怨鶴

放鶴亭辭

并小序

放鶴亭者宋處士林和靖先生之所作也歲久
傾圯莫考遺跡今續構於孤山

缺

郊原日日春風生
即看衛川花滿城
看花泛水醉不已
拄杖時聽黃鳥鳴
吾鄉亦有罨畫溪
溪水照見遊魚清
未由濯足放歌去
春去秋來空復情

送武康張尹欽遷官刑曹

錦樹黃花照江波
西曹郎官白玉珂
秋日東從武康縣
翻然遠上金鑾坡
天子好仁不好殺
慎持咎繇三尺法

大寒之候生冰漸須信天工在旋斡我亦嘗為西曹官
秉燭治生求民寃抱病山中臥不出為君臨岐書贈言

觀張秀夫水墨葡萄畫

憶昔張騫使西域移得葡萄歸漢宮至今相傳徧海內
時至離離熟秋風秀夫好畫意瀟灑半醉臨軒掃秋墨
大宛三種兼白黃無乃獨得水晶黑瘦藤盤曲秋蛇驚
肥顆磊落龍珠瑩已知玉盤承可愛珍重金刀落忍輕
嘗聞釀酒自彼國我生頭白未由識一斗可以換涼州

漫對秋棚想真液

松泉為王汝學題

長松落落出澗谷白石烈烈常風寒上有飛泉半山落
風吹不斷銀河懸知君自是靜者流苦心好松兼好泉
誅茅結屋崖之畔寄傲幽情日忘反四山無人江水清
顧影蕭蕭心獨遠我今亦已謝簪纓白頭願作山中伴

題呂高畫

有客手持澗壑圖云是呂紀之子呂高畫石壁千尋似

鐵立激湍卷雪奔其下上有懸松如老龍蜿蜒行
蒼穹不覺高堂起烟霧海天白日生長風呂紀曾在憲
宗朝指揮直入明光殿金盤賜予出金銀落筆天顏生
顧盼後來繼者無其人呂高之徒傳頗真兼有翎毛奪
造化不獨水石能精神回看雙鵲忽飛來錦羽翩翩儼
生活千巖無人靜杳冥會我幽情亦奇絕

題杏花圖一首

杏花一枝傍雙竹窈窕春姿映寒玉何人移取入生綃

更貌牕間四鵙鵙鵙幽閒增性情穿竹弄花時自鳴
怪底飛花更如雪欲落不落隨風輕國初景昭擅翎毛
近時呂紀畫最好散落人間不易求細看此圖應亦少

雙溪集卷六

欽定四庫全書

雙溪集卷七

明 杭淮 撰

七言排律

送陳文明猷囚江南得雙字

國器青雲無等雙才源潘岳浩如江雲霄功業方談笑
金石文章久擊撞雷漆陳膠元自合郢歌吳調不同腔
石渠高閣風斯振伏氏傳經志乞降登社每憑徐孺榻

聽鷄時憶宋宗牕天王肅殺行秋令玉節迢遙度楚瀧
岸逮齊民傷凍餒刑平今日見淳龐風流剡曲懷賢戴
隱逸田間問老龐三尺糾人全任法一言幾道足興邦
使君將命寸心赤落日飄飄凌畫舸

送童憲副廷瑞致仕次友人韻

畫舫飄飄綠水前蓬瀛何處覓神仙風塵回首機先息
簪紱拋人體亦便鷗喜春江應可狎山憐落日故相鮮
季鷹飲食鱸魚膾彭澤深耕秣米田布襪青鞋從此始

尋花問柳却情偏優游白髮渾忘世卧看飛雲倦鳥邊
復送顧華玉限韻限體

涼生六月薊門秋浩蕩河山景猜舟渺渺雲兼江燕沒
娟娟烟傍渚花浮高天灝氣開行色滄海文星徹舵樓
衣彩已凌淮水曲鷄聲猶憶鳳池頭嫖姚驥子膺長御
九萬鵬圖入壯遊天署清高銓選府地靈盤薄帝王州
陽秋行見照千古勁筆須知回萬牛裴楷清通元自異
商衡眉目更誰收飄飄思遠風雲上振蕩詞雄金石投

籍籍麒麟黃閣迴早看功業耀前脩

雙溪集卷七

欽定四庫全書

雙溪集卷八

明 杭淮 撰

七言律詩

奉送吳中允甯庵之官南都

知君應不重南遷
興在萊衣白髮前
雲度太行虛極目
帆開景倩實登仙
玉堂高寒碧山對
黃閣深嚴太極偏
須信文昌歸北府
暫看秋夜照江天

張氏園陪宴陳希白太守

西園五馬醉青春翠幄高褰雲葉新列屋管絃何意味
傍簷松竹漫精神清池發發錦鱗躍落日娟娟海鶴馴
千載蘭亭感遺事坐移流水送杯頻

七月十五日陪祀山陵

豈為看山數解鞍五陵裡祀歲分官秋清萬壑松濤起
雲白千巖雨意殘神護龍宮森虎豹天垂象緯拜衣冠
陰山直北無沙漠中國朝廷萬祀安

陪祀還至西湖

勒馬西湖看晚波，波浮寒綠上銀珂。
偶教蹤跡親魚鳥，莫把衣裳問芰荷。
巖洞參差諸佛閣，夕天清遠一漁蓑。
無端忽起江南思，水國蘋花半黍禾。

送鳳山戶曹歸省

白雲虛眺鳳山居，此日真登易路車。
朔漠卷阿無牧馬，司農邊徼有軍儲。
江花且拂青春佩，海月先傳白鴈書。
客子出門違定省，寒風吹酒重踟蹰。

秦豫齋移居監前奉寄

幾日不見心茫然秋菊已過黃金錢雅韻有時自發響
茅龍對客如揮掾功名累人不自放梧竹入夢應相牽
初冬日短簿書急安得跨馬遷居前

金門待漏為徐黃門父作

東方錯落明星稀城闕縹緲紅雲飛鷄人忽鳴宮漏早
環珮時動春風微遙瞻日月移宮扇每憶文章上衮衣
報答昇平殊未已鳳毛隨步集黃扉

酬張大理君玉見寄

故人南去頻迴首歲晚秦淮雪正深已分梅花發春渚
幾迴冠蓋出疎林簿書南北休相問江漢風流自不禁
珍重隋珠到金闕光芒中夜照虛襟

朝後和友韻

天闕紫雲浮曙光臘前春已動鷓鴣行香爐烟繞翠華煖
旗綴風飄赤羽長退食侍臣爭緩佩登臺太史漫書祥
作歌好入三王頌補袞須裁五色章

芙蓉燕贈大梁丘伯玉隱居

江北芙蓉非土性秋風故向野人饒夢醒霞綺只臨渚
日落春醅猶滿瓢不向荒烟悲暮景自甘白髮老清朝
也知愛菊陶元亮祇為微名懶折腰

送陳太僕明之往滁

省中北斗司王舌海內麒麟驚世姿金石辭章成獨步
雲霄功業未應期渥洼在漢龍駒出萬歲歸唐鳳苑宜
春滿瑯琊江日麗醉翁亭上好題詩

哀同寮胡允修

濫叨畫省初逢日玉椀冰壺夏出塵書著茂陵多病渴
詩鳴東野數驚人人生時富有匡君略死日貧無買柳緡
冠蓋蕭條春色暮飛花迸淚滿江津

送范仲讀仲瞻之官衡府

漢分州郡多文學魏傳諸王始列員計上春卿應小試
官從今日亦榮遷竟陵西邸通詞客吳淞東山不鑄錢
暑雨城頭發雙佩朱葵爛漫照人妍

懷昭應宮簡劉美之長官

蒼松碧梧昭應宮中有層臺亦何雄
白雲飄飄度山袂
高棟灑灑含秋風
下臨陂塘水迴洑
西挹巒嶂烟冥濛
安得謝公短蠟屐與君蹴踏青空

送閔司寇弟歸烏程

迢遞星槎天闕曙
聯翩鴈影薊門春
韋賢在漢調元日
巢父逢唐洗耳辰
館閣紫荊人共逐
池塘春草句還新
渺然雲旆江湖濶
北斗應迴白首頻

酬儲光遠通州惠酒魚至

莽莽朔雲草木黃淒淒寒色催衣裳
白馬風塵各拘繫青天鴻鴈獨翱翔
封泥春酒竹葉碧出水鯉魚金色光
退食自公燒燭裏煮魚開酒為君嘗

至日陪祀山陵二首

消息青陽迴厚土微茫白雪霽寒村
沙堤日射青驄馬野屋雲移竹葉樽
漢代衣冠連朔漠天山羽箭照乾坤
五陵王氣終天極西北羣峯擁地尊

龍翔鳳舞英靈窟萬壑千巖紫翠分天上玉臺寒積雪
空中金殿迴浮雲百年青海無傳箭今日朝廷正右文
一奠新陽昭格裏松蘿香氣入氤氲

酬錢水部士弘歲暮移居見示

日短東城數拜難新居地接可交歡
恰須坐起寒燈落更道經過凍雪乾
越繭封題詩律細隋珠開篋夜光寒
少陵門下將遺法翡翠蘭苔信莫安

輓同年傅汝源父

雲母屏空白首郎儒衡風雅尚歸唐青雲子弟聯豪雋
哀壑文章有耿光春斷玄猿日慘澹雲迴碧草水瀾茫
緬懷谷口青芻束回首聞天鳥道長

寄題京口王秀才樂山樓

甕城紆迴樓閣雄青山無數上簾櫳有時白雲起飄忽
隔江細雨生冥濛琴書靜接松杉潤城郭遙鄰澗谷東
何時江頭看落日一上題詩蒼翠中

午日望雨和韻

葵花榴萼訟庭春
炎日蒼茫遞曉昏
天上行雲不作雨
民間白麥已空村
傳聞江淮更絕粒
呻吟溝壑重招魂
佳辰罷倚一對酒
歷歷衆星明閣門

送秦豫齋之官江西

書劔飄飄作宦遊
錦帆風色動炎洲
朝吟水國蘋花淨
夜傍關山月影流
誤許論心淹闕下
那能並馬到江頭
南行若見劉夫子
應踏爐峰看好秋

奉送儲太僕靜夫典牧魯汴便道過家次韻二首

霜下黃花晚更榮
野亭秋色照盃明
風烟郭口爭憐客
鷗鷺江寒獨後盟
浩蕩流沙神馬至
蒼茫河洛傳車行
也知別後相思處
郭隗臺高春日鶯

玉節飄飄滄海上
別遙休怪酒行頻
大河落木雲衣薄
東閣梅花雪片新
皎青天唯見鴈烟
寒白馬不煩塵
到家兼得仙翁慶
麴米先迴海屋春

送陳文明別卷中有王文肅諸公之作不能無感
倉皇行李背高城
菊蕊寒雲十月程
詩卷拋人渾面在

玉堂遺墨總心驚風塵浩蕩孤飛翼雲漢蒼茫萬古情
聞道東湖春色好因君一日想南征

見雪奉和許給事啓中見寄

十月八日雪花動高城雲氣兩迷茫亂紛逐馬臨丹闕
潔白隨鷗到野塘喜接地曹兼水部

吉獻世
恩同席

起看白晝

自昏黃題詩酌酒興堪縱歲稔不須憂太倉

長空白雪縈春絮宮闕參差入渺茫忽憶清風動江漢
須知幽興滿林塘梅衝凍蕊將分白蕉濕雲衣欲卷黃

忝竊聖朝無寸補擁裘高坐食官倉

送潘司訓芳赴任桃源

縞辭藻思美青春官冷羶寒人不貧紅日行盤苜蓿長
滄池得雨蛟龍神桃源人文鬱已久泰山師道今來真
秋淮繞城碧於靛且對芳樽歌白蘋

宿巢縣僧房

斜日荒烟到石門風林寒葉上堦繁蒼茫展枕暮鐘出
啾唧爭枝叢雀喧驅馳山川復歲晚喜少冰雪仍冬暄

青蒲紫蟹出不意乘興杳然還對樽

會鄉同年席上見雪兼詠菊

仲冬官衙見微雪白菊有花還可憐依依對眼驚秋盡
片片隨風落酒邊客鬢年華俱浪轉人情物色漫相牽
相逢此夕是何夕迴首鴻泥各惘然

除夕直宿部中同張元德刻韻賦

禁漏迢迢傳夜永椒盤相對燭花明省郎多病經秋骨
客鬢雙蓬萬里情凍葉庭深餘雪色哀鴻天濶帶春聲

鄉關臘盡無消息迴首蒼茫北斗城

奉次省中諸閣老讀卷二首

縹緲翔雲紫閣陰忽傳仙樂自天音
瞻依綵仗臨軒日吐哺蒼生得雋心
香麝春迴三殿合陞花風動五樓深
濟世文章須補衮許身不愧雙南金

海內文章連僻壤百年風俗變皇猷
龍門重疊隨雲鯉桃野逍遙息駕牛
春閣宏開星宿動畫庭三接聖恩優
披圖稷契今連茹歌舞唐虞億萬休

奉懷李獻吉移居郭外

思君臘盡又春來
河上春濤萬里迴
不覺柳條已弄色
湏知棣萼久相開
城中車馬應無數
野外鷗羣不見猜
生理今開五車卷
風塵虛抱出羣材

奉寄銅仁守劉美之因述所懷

銅仁風景近如何
書札經年少見過
府中春至杏花發
城下草深豺虎多
日暮青山應獨醒
詩成白雪自高歌
漸看遠客如絲鬢
未着春湖萬里蓑

懷黃明甫

萬里江亭春色來波紆洲渚雜花迴有時移舟醉不去
落日見山顏好開天上麟兒生玉角人間王母降瑤臺
百年聚散頻回首一月題詩寄野梅

王貞婦祠

婦寧海人舉家歿于賊而婦以色全攜至清風嶺啣指血題詩石壁投崖下死

有司祀之

盤旋石磴清風嶺獨屋臨江貞婦祠悠悠水鶴自朝日
漠漠山烟空竹枝一死巔崖無寇盜垂名宇宙見男兒

血痕題處桃花發萬歲千春亭祀時

西湖僧閣和邵二泉諸公韻

紅塵入寺已知遙更有巖扉竹色驕秋水微茫來殿脚
白雲出沒自山腰百年歌舞西湖地落日風烟萬里橋
指點岳王墳上栢野人猶自說前朝

新修岳武穆祠

悵望秋風薦野蘋忠精祠宇肅瞻新寒烟白石荒山暮
枯木南枝萬古春志決幽燕終報漢眼中頗牧已無秦

金符十二如兒戲豈料安危繫若人

送陳汝和侍御還朝

青春玉節照江濱南北高峯不作雲風入皂鵬千里骨
日懸驄馬五花文都亭蹤跡休相問破柱風流今尚聞
朝覲明明揚側陋須知冀北已空羣

新春飲西湖亭上

小亭悠然晚閒寂細雨鈎簾春已多石欄花發亂青苔
沙岸雪消生綠波忽聞饒州寇猶發豈謂西湖船自過

怪底笙簫來海上風飄律呂入雲和

都元敬乞養親改官留都兵曹

不見而翁今七年白頭強健似神仙
逢人再拜不扶杖出郭看花還泛船
司馬新遷過江上青春迎養小車便
送君自是惡懷抱菊盞寒雲當別筵

獻吉卧病久不相見見時輒飲我酒
且出示病中之作奉和一首

眷戀馬卿消渴久蒼茫春事入江新
藥鑪白竹自為伴

草閣青朝虛待賓
吹面春風不覺醉
墮懷明月更堪珍
秦山渭水知多興
爛漫苑花休照人

復送獻吉次韻

美人欲發車渺渺
明星在門雙靷長
已知出此風塵表
安得從之河水央
梁苑新春行見月
潼關今日始還鄉
百年邂逅何由擬
相對清樽各渺茫

臘月秦鳳山呂思泉招遊陳氏園亭時以體疲天
晚違此雅集明日思泉詩至追想和答

習家池館多風景有客來歌水雪天棋局酒盃殊不惡
疎梅寒竹更相鮮病嗟筋力驅馳後興落江湖笑語邊
賴有高情不相訝燈前還寄白雲篇

經呂梁蔣主事守謙留飲出示其父與翰林諸公
往來簡札感而賦

萬夫洪頭看打船邀我狀元亭子間石根叢篁照盃盞
江漢春風吹客顏潼川太守風猶在省掖文章氣所關
掩卷出門增感慨雲寒日暮呂梁山

新正二日發宜春次王陽明韻

宜陽山前莎草痕
春泥釋釋水流渾
客行遠道無停轂
人拜新年不出村
三日暄蒸北風作
清朝陰靈江氣昏
野館蕭條亦足賴
梅花為我招吟魂

桃源山中

青崖逶迤綠不斷
新春人家烟火同
山間溪流已覺煖
洞口桃花爭放紅
昔聞秦人避亂此
誤疑仙竈非世通
風景當時豈應別
萬山今在馬蹄中

經盤江次劉元瑞韻

踰岡陟嶺兼多病臘盡春來不記程瘴水已知多客淚
窮山只是有人行綠崖畫霧愁俱黑觸馬春花眼一明
西蜀未知天下險老夫筋力盡南征

清華洞

萬壑西來見茲洞不知開闢是何年玄宮虛靈秘造化
白日淅洞生雲烟著脚重關愁鬼魅舉頭一竅見青天
出門悵望來遊客石壁題詩尚儼然

傷范君山之亡

春日永昌訪張南園見其子含舉人含秋暮來滇
別我上春官出示諸公所贈卷因用韻末簡

永昌三月醉君堂滇海君來落木蒼尚想閒翁憑几杖
溫然一笑即春陽范湖春色扁舟老漢苑文章兩省郎
萬里雲霄今刷羽翩然五色佇翺翔

飲含於昊天閣復用韻贈別

風急天清郡郭堂仲冬山木晚蒼蒼盃浮碧海移春色
樓倚千峯斂夕陽君行擬作金門客文彩先依玉署郎

北極迴看天萬里孤雲矯矯冥鴻翔

早發崇岡即所見

霧勢漫空亦何盛日上高峰今却降晶晶晴嵐低萬壑
冥冥秋氣失三江石壁飛流自霄漢天關擁樹如旌幢
終朝看山一迴首雲裏芙蓉猶自雙

過浪滄橋

橋名
霽紅

橋飛江崖霽虹出鐵鎖高緣不記年急江轟雷鬪日夜
懸崖峭壁參雲烟水深如聞鬼魅泣石錯却訝蛟龍纏

不有簡書來絕域豈知天下有山川

興隆東坡書院和朱凌溪韻

欲於何處覓仙蹤
悵望危欄俯碧穹
石巖烟雲虛半壁
春深花鳥滿幽宮
乾坤一繫西來馬
劒佩聊乘萬里風
不必殊方問招隱
蜀山原有小舟通

吾宜興蜀山亦有東坡書院

京口楊十舍承嘉邀飲甘露寺次喬白巖司馬韻
虛危樓閣江之干
細雨清秋作早寒
粉堞屯雲松杪出
雙峯積翠坐中看
長空浩蕩孤飛鳥
萬古升沉一倚闌

差向山僧說蘭杜又聽鳴玉上長安

棟庵為黃朝用作

中山同事校文初卅載驅馳會面疎
忝竊看花成白首
棲遲種棟只安居
風吟高葉琴樽曉
雲接長溪戶牖虛
何日扁舟掛冠去
洮湖東畔訪幽墟

送虛亭許方伯致政還家

江郭虛亭息宴遊
黃花無數照清秋
功成四時亦有序
人昨少年今白頭
水上鷗輕故泛泛
山間雲白何悠悠

回首當時濟渡處風波滿地使人愁

辰溪山詠石

辰溪山間多美石盡日經行殊可憐
髣髴蛟螭愁並出忽看虎豹訝羣眠
臨溪瑩滑朝含雨近竹蒼茫晚上烟
豈是風塵厭奔走一教醒眼到行邊

界亭山中雨

山行四月苦多雨豈是楚天巫峽鄰
溪谷亂流愁度馬陰風吹壑斷行人
浪蒼花益不禁濕天矯青楓何劇新

日暮蒸雲應未已江雷殷殷送聲頻

浙上諸公招飲孤山次韻奉別

五年不到四賢堂門外疎松只自長日月重看此湖水
風塵深惜故人觴峰高野鶴孤雲迴臘近江梅白雪香
風景總應憐舊客簡書先已赴滇陽

蘭谿道中

寒風簌簌春初袂江雨冥冥日暮臺更愛好山行不盡
雙看白鳥去還來路岐南北皆君賜夷夏文章總運開

魏闕五雲舟萬里青天孤節首頻迴

王山見梅

青山郭口見梅花落日分明幾樹斜迢遞風烟念鄉國
驅馳鬢髮感年華杖藜雪後為誰適道路看來可自嗟
不有世情空物態碧江疎影弄寒沙

贈錢太常貴

文雅初逢太常客朱炎再揖郢中儀風塵病裏常須藥
山水情多不廢詩惜別酒邊江為白倦遊天際鳥還遲

虎丘青春白石爛短棹相將攜所知

滄瀛阻風贈沈方伯仁甫致仕次韻

河上風塵暗不開停篙罷槳亦悠哉
冰花散落隨江浦春色相將到酒盃
滄海浮雲看變幻盤渦飛鷺浴還來
古今得失尋常事吾獨憐君濟世才

鄭家口舟中別河間倅穎卿家兄

我行向南君向北弟兄分手難為情
况是關山皆客裏不堪滄海又春生
柳條纖纖已弄色鴻鴈兩兩時哀鳴

相看只有今宵月
兩地隨舟各自明

春暮赴楚經吳登虎丘

邂逅入山春已暮
留連眺遠日微曛
琅玕風動千人石
樓閣天開萬頃雲
春滿劒池龍出躍
花飛講座鳥來聞
何時脫略風塵履
經壑長穿麋鹿羣

輓趙表兄襄

缺

秋復春寂寥無復見
斯人翻思帳下缺齋日

猶似花開對酒晨
江海飛雲空逝水
丘缺春色老荆榛

援毫為寫雍門曲蕭颯悲風生白蘋

東藩飲湖上尹亭次壁間韻

飛雲臺榭愜初登似隔紅塵一萬層湖上枯荷不可把
欄間細菊已堪凭暇時數好來題竹避俗何煩更問僧
罷酒放船紆晚郭寒沙碧石亂秋燈

春初飲悠然亭上簡同僚

悠然亭上坐春風落日清樽幸不空弱柳漸看低檻碧
天桃似欲向人紅地分省寺通僚晚春入江湖引興同

總作淵明賦歸去南山亦已笑成翁

醉翁亭

想見醉翁亭自昔拜翁今及暮春遊娟娟野竹侵虛幌
片片飛花點石頭醉於山水亦嘯傲名在文章自不休
帳望千秋太守去瑯琊山碧釀泉流

琅瑯感古

千載琅瑯王去後至今瑯琊山擅名眼中城郭空形影
天下山川幾變更明月溪頭花自落曉光亭上日長生

荒涼留得前朝寺時有遊人聽鳥鳴

龍里憲臺端午

榴花無數雨中開何處逢人問酒杯
萬里心驚懸艾日孤城客傍望鄉臺
苗蠻女亦踏歌去都市人爭取醉回
但使三邊常晏樂不辭寂寞過山來

春日周陳王氏園亭

楊柳微風渡小橋波涵人影半虛搖
水深

江湖大

地僻已知城市遙魚戲落花吹細沫

含疎靄上青

霄主人會有幽居興命駕時來不用招

次周中丞邊太常遊雨花臺見寄

極知薄領清朝簡每憶雲臺野騎雙冠蓋青春飛白石
烟花百丈俯清江憐君俊逸詩無敵老我清狂意未降
何日春流一擊楫同遊高拂雨花幢

寄林侍御鉞父紫霞山人

緬想清風不可攀廿年高卧紫霞山青春谷口芝應長
白日爐中丹幾還雖無足跡踏城府已有文章鳴世間

繡衣特立當霄漢
諫疏時聞抗帝顏

中秋對酒安山舟中

去歲茲辰繫溟海
今宵對酒却安山
仰看明月同關塞
歎息風塵老客顏
露下高天秋與白
櫓搖寒水夜遲還
天王出狩臨西極
萬里清光誰為攀

送張司空還蕭山

白首功成合身退
片帆江上羨公歸
官休於我無拘束
世上從他有是非
醉倚春風歌短棹
卧看雲月上閒扉

蕭山舊識藏書處投老于今信不違

泊舟采石

西來繫舟沙柳陰忽聞枝上蜩蟬吟客心日夜驚時改
春首驅馳復夏臨謫仙祠空殿突兀采石江上松陰森
當時騎鯨上天去此事有無傳至今

秋日渡河喜會李崆峒

思君今得渡河來河上秋濤霽色迴廿載離居洛陽市
春風憶別黃金臺季鷹江上鱸空羨陶令籬邊菊正開

明月樽中照白髮故人相對莫相猜

閱汴城

時正大水

大梁城高曉日赤千雉萬雉皆春風獨看旌旆行雲表
半覺樓臺出水中自昔黃河有遺患千年神禹無全功
須知保障吾曹事忍使民間杼軸空

晚步後園奉次殷文濟韻

徐步荒園信晚晴尚思昨日對君情杏花開盡無餘朵
鶯語聽來不息聲已惜春光過半去寧辭酒觥十分傾

罷衙若看還相過
歇馬池頭看水生

中州遷南太僕正攜酒李獻吉莊酌別

仲冬曉出東城行
落木空原霜露清
暫脫簿書非所事
招攜朋舊却多情
新構草堂當野曠
尚餘花蕊近牆明
于今已惜南州別
不及春來聽早鶯

是日晚復攜酒後亭得園字

荒荒寒日下郊原
惜別幽亭剩酒樽
白髮孤舟今獨遠
新詩何日更同論
啁啾羣雀喧爭樹
瀟灑叢篁寒趣門

去去江湖分南北春風回首憶名園

陶副使分司見桃花和獻吉韻

分司偶得見桃花倚檻含風自可誇怪底已飄千點亂
開遲猶及一枝斜漫將春色供文案豈有新詩領物華
徙倚高城日欲晚海風吹落九天霞

次王少司寇存約冠山韻

衙罷重門掩不開傳呼小吏送詩來已知司寇風情逸
遙逐冠山春色迴梅益相將衝凍雪鶴毛行見長蒼苔

因君興入滄洲遠却憶任公舊釣臺

任公釣臺吾
宜興地也

二月晦桃花席上得微字

去年花開二月早今年開遲猶未稀眼中花好只如舊
鏡裏紅顏今覺非且拚綠酒樽常滿幸際清朝願不違
急管繁絲悲律呂飄風度水入霏微

是日酒罷興不盡更酌花底

落日餘樽仍爛漫穿林倚石重徘徊嬋娟細竹低紗帽
窈窕飛花落酒盃自驚白髮遷官裏又見春風兩度來

未得拂衣傷老大相逢桃李且顏開

九日柏子龍潭山和友韻

碧草叢篁麗客觴柏潭秋晚石蒼蒼長雲南下江流迴
諸嶺西來龍鳳翔去年遨遊汴水上今日重飲滁山陽
黃花悵望照白髮抱病令人思故鄉

聞邵尚書二泉失火賦以奉慰

何事乃遭回祿變驚聞初得太常書

太常邊廷寶也

樓災萬卷

誰云盡腹笥於公却有餘鶴步頓教忘舊徑燕來翻喜

定新居

聞新屋將成

白頭留得尚書履應聽飛聲上玉除

飲悠然亭復用去年韻

正月再歌池上風雪融春水映晴空柳仍黃色相將動
花似去年猶未紅白首笑看朱紱在青春還許一樽同
清時司馬無繁政對酒何心學醉翁

次韻贈吳友丁壽卿

西來書劍凌秋色江上相逢一解鞍浙水春風思獨遠
滁山白髮幸同看高車信有題橋志雄論真如下坂丸

黃金臺高貯賢俊去去休嗟行路難

豐樂亭次韻

蒼茫江漢坐秋清落日餘樽酒再行
遠樹兼天浮海國銀河如帶挹州城
人家爭賽鷄豚社邊塞不聞鼙鼓聲
歐子文章猶在石高亭一豁古今情

奉贈西青錢先生

凌駕洪濤勞遠訪攜將秋色過江城
青鞋布襪無塵土碧水丹山總性情
幾共躡雲尋壑去醉看騎馬覺身輕

簪纓忝竊今頭白常使橫經憶後生

十日滁山留共觀漱泉眠石幾盤桓黃花秋盡猶餘色
十月風高已覺寒江舸飄然發何早家山雖近會應難
釣絲百尺春湖興焉得相從雲水寬

寄壽秦鳳山司徒六十次韻

遙慶君年思上日開筵切近鳳池頭高天北斗頻回首
九月黃花正好秋盛世文章追兩漢中興功業在今周
麒麟黃閣圖應遠未許沙邊問白鷗

白下送西賓韓朝望歸浙

十月霜清白下山東書東上浙江船燈明秋夜傳經榻
菊蕊寒雲送別筵朱紱慚余成白首清才羨子美青年
秋鷹已刷排風翮凌厲行看向九天

奉送同年朱玉峯太宰還鄉

憶同攀桂向秋天轉盼于今三十年供奉三朝勞補袞
衣冠八座入蟬聯清晨江上舟初發黃菊樽前秋可憐
未得相從拂衣去風塵回首思茫然

飲胡祖貽西園得春字

霏霏花絮散餘春
園鑠開時逢故人
攜手同行脩竹裏
舉杯還照白頭新
雲生虛壁疑成雨
風動微波不起塵
乘興看山如有暇
日來亭上不嫌頻

送黎仰止通政入朝

官舍葵榴侵別酒
銀臺旌節入青霄
浮雲滄海憐行跡
綵鷁炎江問早潮
舟入三湘休聽雨
珮缺雙闕候鳴朝
舍人獻納從容裏
香轉春風玉殿遙

官塘道中有感

憶昔槐黃趨詔去今朝頭白解官歸
蕭條門巷不如故
借問主人今亦非
山映陂塘空水綠
春深楊柳自花飛
廿年轉盼即今古
迸淚臨風欲墮衣

贈李介庵次其自詠韻

安晚極知前輩少
安晚介庵父
流風仍見後人同
介高一代

休隨俗道在青瑣
得屢空短杖臨溪秋
獨遠晴牕點易
意何窮迴思絳帳東樓日
歎息今皆成老翁

胡夢竹園亭次周約庵中丞韻

樹裏澄波靜不流，坐深長夏轉看幽。
孤峯絕壁倚飛閣，落日輕霞明遠丘。
野外冠裳從我懶，山中猿鶴為誰俦。
主人留客不知暑，揮翰清風百尺樓。

春日陪鳳山司徒遊善權次韻三首

雨天載客清溪舸，來聽春山寺裏鐘。
洞口浮雲濕仙袂，山深老檜卧虬龍。
寧知石上三生夢，不願人間萬戶封。
謝公今有東山屐，踏徧雲崖日萬重。

洞中

忽忽重來今廿年追思往昔事茫然紫芝猶帶青春色
日月常開小有天丹壁蒼崖愁絕倒瓊脂玉柱訝空懸
青驪欲覓神仙跡昏黑重關不可攀

小水洞

洞坼烟霞別一天春隨酒盞落花前千層巖壁空懸石
百尺寒潭地湧泉仰看老樹垂雲雨恍惚神龍躍九淵
三十年來走塵土共君今日一惺然

芮從遠主西塾兩年歲暮辭去用其留別韻以贈

二首

臘盡郊扉雪色融疎梅已覺漏春風別攜此日江湖遠

惜爾忘年契誼同繾綣贈行聊短句交游為我謝諸公

春來莫問徵求使襪線元非補袞功

芮從遠有擬上黃金殿之句故云

珍重君賢似孔融故家喬木有遺風吾心自省應無疚

古道誰云不可同推讓智謀甘獨拙豈因蓑笠傲三公

吾孫解事青雲業他日寧忘一溉功

奉次鳳翁元日見寄

白頭又領歲新朝，自頌椒盤歌且謠。
門外唯多白鳥至，海東時見紅雲飄。
已覺江村無凍雪，即看春色上寒條。

湖南湖北青峯寺，放杖還應託聖朝。

時鳳山約遊華藏諸寺

初聞製作本真禪

作爐僧名真

一落塵寰五十年

吳歸然

存古朴湘紋，猶自帶嬋娟。
豈應世上無珠玉，自是山中有宿緣。
細淪龍團伴枯寂，二泉應得並流傳。

陪聶侍御飲滁山僧舍，用壁間呂太常韻。

壑轉林迴石徑微
追陪驄馬到巖扉
憶從歐老當時醉
始覺淖山天下稀
落木風巖秋浙瀝
寒雲菊蕊晚相依
樽攜竟日淹留興
竹露熹微下夕暉

遊華藏

童稚知名今始遊
寺門高對三山幽
波濤冥冥白日湧
石壁晶晶孤雲浮
題詩昔日人何在
醉墨空堂跡尚留
邵半江詩
字在壁 悵望白頭一灑淚
江山千古自清秋

紫巖劉太宰見寄牛首山之作惜余未遊用韻道

情

南都故人別我久千里懸旌心日勞無路趨蹌缺佩裏

停雲迢遞星辰高花巖自昔聞牛首僧屋緣居似鳥巢

安得同遊一攜手直從高處看江濤

天高牛首恣躋攀秀句封題紫翠間南國清朝無冗政
玉堂春日有餘閒看山躍馬總多興懶性出門常自難
此日因君重迴首天青雲白鳥飛還

經三衢鄉同年楊節推時明攜酒郊外押韻

迢遞河山惜遠遊，樽攜野寺重淹留。
驅馳志業元相信，得喪乾坤可自謀。
沙際寒花仍照席，江空落景半含樓。
轉看月殿酣歌裏，奔走風塵今白頭。

奉和鳳山東園燕集見寄

山中梅蕊欲衝寒，冠蓋東園憶舊歡。
池竹照人青送酒，江鱗出水素行盤。
幾年丘壑違高枕，雙鬢流光惜轉丸。
金闕封題將野遠，司徒情興逐人寬。

春初酬李蒲汀見寄

漸看苔色上堦除卧領春風到草廬習懶自知成性癖
無書却怪故人疎青春花好還應惜野水舟輕信所如
誰謂壯懷應不負于今髮白已無

缺

缺

貴州徐中丞養齋見懷

堰

缺

照山赤溪上斷虹吹雨晴百粵清秋瞻使

缺

知明月見君情久知德政風移速不問蠻夷志在行
且喜清平伐罪後香爐山色至今明

烏蠻千山控巫峽瘴雲多陰常少晴信義不忘惟我事

言行雖異亦人情月高瘴海羣氛靜雲白秋邊一鴈行
有虞脩德三苗格今日天王本聖朝

客至園亭

東來乘舸自吳門長夏江村暑正煩一別兩年稀會面
盡歡今日為開樽故人飯糲應無厭白首官高何足論
池有遊魚岸有鳥悠然相對欲忘言

壽周約庵中丞六十

由來忠盡說元公周室中興百代功獻納皂囊紆十疏

指揮黃鉞定三戎舉醜秋移金斗月釣絲春入五湖風
看君筋力猶強健補闕常須上袞龍

谷明府少岱迎母同至喜為賦

宜興豈似河陽縣桃李花開今滿城滄海潘輿非道遠
他鄉萊綵覺春生風從百里俄應動政逮三年信有成
事簡官清山繞郭鳴琴斫鱸有餘情

元日迎春谷明府設宴病不及赴口號奉簡

喜逢元日歲新政忽報東郊春又來花擁土牛喧曙鼓

笑迎竹馬上春臺桑田夙戒文公駕雲物先開宓子盃
多病馬卿違獻納興來自起折江梅

王中丞定齋詩送谷明府念及老夫和以奉酬

趨朝早發秋江舸念我遙傳臘月書攜手缺從河上別

掉頭今已七年餘策勲終見麒麟閣懶性唯甘水竹居
邑宰將詩共春至金門高興起迂疎

酬張翰林水南亦因谷詩見及

春風日夜吹郊墟又見小桃紅欲舒白髮滄江祗高卧

金史四庫全書
卷八
玉堂清興定何如題詩送客遙憐我多病經年闕致書
自是山林隔絕久夢魂不到承明廬

毘陵舟中餞鳳翁司空

北斗天旋舟好發九重春早望應深典刑自昔唯求舊
日月重熙正際今夏禹獨先溝洫計漢文終惜露臺金
江郭春風吹酒醺送君一為白頭吟

題南灣井小序

莊下圻施氏舊族也中衰而散落有以立者遷

圩之南灣業頗新且讀書事進取自號南灣因
為之賦

舟紆北渚轉風浪春入高城幾往還喬木眼中無故宅
行人溪上問南灣沙堤竹長縈新水書屋花開帶遠山
回首鄧城寶劒氣中宵應出斗牛間

蓼莪山奉次澤西兄韻

五湖春色際天來沙鳥風帆遞往迴笑日野花幽近竹
入雲風磴冷侵苔棲遲白首唯疎放報答青春有酒盃

好事山僧老不倦晚猶攜客上高臺

龍池山中感舊

三十四春如一夢持盃強飲對芳辰憶昔賜霑歸省日

攀蘿曾侍白頭人

進士時同先君遊

兜率青山只自好龍池修

竹還如新悵望殘花照佛閣迴頭血淚迸青春

飲吳頤山憲副城南新樓次韻

愛汝溪上之高樓五橋春日駐行舟簾開羣山却盡出
簷迴白雲常為留玉壺分饌攜丹橘野客題詩迴白頭

致身且作鳴珂去他日與君停宴遊

龍池山上庵

龍池之山挿天高逶迤石磴綠秋毫青霄削壁千尋立
僧屋如巢結構牢複棧空中愁度鳥長松脚底訝翻濤
更欲高尋捨身石雲寒日暮猿哀號

懋才朱子學以遷居詩見及用韻奉簡

聞道春來新卜居東城風物定何如應知社燕來看主
却訝銜泥非舊廬諸生之貧見原憲秦國取士思由余

想像清風動牕竹日長閉門惟讀書

谷少岱吳頤山夜集娛晚堂次韻同賦堂蓋先達
諸公宴遊之所

娛晚有堂城之陰多情清夜許追尋霄漢早看聯珮玉
風塵久已謝纓簪庭葉驚風山雨至春杯信手燭花深
舉頭畫壁空諸老猶憶當時醉裏吟

方君英舉人歸閩賦以別

斬蛟橋畔逢荊州令我一豁風塵眸疾看驥足當千里

神薄瓊枝瑩素秋孤帆十月思東下水落江寒正穩流
因憶君家丈人行曾聯鳴玉鳳池頭

賀谷明府生孫

高岡梧桐日莘莘春來又見長孫枝山川孕靈亦不偶
德政感人應在茲頭角峻嶒嶽骨起文章五色鳳毛奇
他日高風有乃祖應知指是宜興兒

觀黃元敬新葺園池留飲亭上得開字

戊子臘月二十四日

逶迤池上徑新開喜值春風七日迴

時立春已七日矣

竹合露

稍低近席波消雪色上浮杯作亭擬養千年鶴視野還
崇百尺臺從此知君藏不出相尋待我拂衣來

癸巳暮秋復至元敬園亭惜不見主悵然有作復

用前韻

三徑幽紆只自開杖藜徐逐小池迴參差舊榭缺霜缺

望無情對酒杯竹裏有亭還缺落日重登臺

不堪吟罷一回首唯見白雲缺北來

雙溪集卷八